



UNIVERSITÄTS-
BIBLIOTHEK
PADERBORN

Universitätsbibliothek Paderborn

**Joannis Bonae, Eminentissimi S. R. E. Titulo S. Bernardi
Ad Thermas Cardinalis Presbyteri Opera Quotquot
hactenùs separatim edita fuerê Omnia**

Bona, Giovanni

Antverpiae, 1677

Cap. XI. Gemitus animae poenitentis pro incipientibus.

urn:nbn:de:hbz:466:1-10805

O Fons decori luminis, (35)

O lux serena siderum,
Ignis Deus purissime,
Vigor perennis cordium.

Te voce semper, te prece,
Te mente gratâ, vindicem
Meæ salutis concinam,
A Sole Eoo ad Hesperum.

Tu spes mihi, tu præmium,
Tu portus es fiducia:
Te fretus uno pertuli
Sortis procellam turbidæ.

Inter labores asperos
Lumen tuæ clementiæ,
Repenitè fulgens, vim procul
Abesse iussit Tartari.

Salve supernum incendium,
Clarumque mentium iubar:
Ad te reverter, supplicem
Voca per ignes mysticos.

Descende flamma, illabere
Cælorum ab arce fulgida,
Injunde cæno pectori
De fonte lucis lumina.

Cor, ossa, fibras concrema,
Venas, medullas, viscera,
Ipsamque mentem, ac spiritum,
Ut totus ardeam tibi.

O fors beata, ô gaudium,
Coniuncta cum mens Numini,
Et immemor rerum omnium,
Te diliget perenniter.

Summo Parenti Cælitum,
Natoque, & almo Flamini
Sit laus, decusque perpetim
Nunc & per omne sæculum.

C A P U T X I.

Gemitus animæ penitentis pro Incipientibus.

QUAMVIS expertis difficilè non sit, propriis motibus ad Deum assurgere, possitque unusquisque ex pharetrâ sui cordis sagittas orationum depromere; ne his tamen deficientibus pius Asceta aridus reperiatur, defectuive lignorum mysticus ignis in arâ cordis extingatur: ex scripturâ, & Sanctis Patribus sylvulam

(35) Ex libello meorum Carminum novam impresso.

Aspirationum collegi, pro triplici statu Incipientium, Proficientium, & perfectorum; in quarum usu & praxi quid servandum sit, jam supra explicatum est. Habes hinc eas in varias decades distributas, quò facilis valeant memoriæ mandari: cui studio aliquot dies tribuendi sunt. Quid enim prodest multas Aspiraciones in libello descriptas habere, nisi etiam memoriæ inscripta, imò & insculpta sint, ut in promptu habeantur omni horâ, & memento! Propono autem primo loco gemitus animæ penitentis, naturæ, & doctrinæ ordinem sequutus: quia, ut perveniamus ad id quod nondum sumus, purgare primò id quod sumus, & lacrymis eluere debemus.

DECAS. I.

1. **D**omine Deus meus, ego vilissimus sum peccator; indignus planè, quem terra sustineat. Miserere mei, & salva me.

2. Domine, qui es summum bonum meum, quàm longè per peccatum recessi à te, & habito in regione hâc longinquâ miseriarum, ubi perdi di me.

3. Pater amantissime, peccavi in cælum & coram te, verè non sum dignus vocari filius tuus, fac me obsecro sicut unum de mercenariis tuis.

4. O quàm pœnitet me peccasse, dulcissime Deus, quàm pœnitet me, quòd legem tuam transgressus sum: amplius lava me ab iniquitate meâ, & à peccato meo munda me.

5. Domine Deus meus detestor peccata mea, abominor universa flagitia mea, confiteor ingratitude meam, & confugio ad aram misericordiæ tuæ.

6. Ablue me Christe Jesu pretioso sanguine tuo, & munda me ab omni peccato.

7. Sana Domine animam meam peccatis vulneratam, unge oleo gratiæ tuæ cicatrices delictorum meorum, ne quaeso despicias me.

8. Domine Deus piissime, ab hâc horâ nunquam transgrediar legem tuam, nunquam amplius consentire volo in aliquod peccatum: malo incurrere omnem pœnam, omnem infamiam, atque ipsam mortem, quàm deinceps peccare.

9. O Pater amantissime, da mihi ut faciam fructus dignos pœnitentiæ, & puniam delicta mea debita castigatione.

10. Erravi sicut ovis quæ perierat, audio tamen

tamen dulcissimam vocem tuam: Tu fornicata es cum amatoribus multis, tamen ad me revertere & ego suscipiam te.

DECAS II.

1. **N**unc cœpi, Domine, nunc vivere incipio, non in fortitudine meâ, neque in virtute brachii mei, sed in multitudine miserationum tuarum: confirma hoc tu, quod operatus es in me.

2. Tu, Domine, integros sensus & cor docile tribuisti mihi: sed heu me miserum & infelicem, quia omnibus bonis tuis abusus sum! Tu verò Pater misericors peccantem revocasti, & à poenis inferni liberaisti.

3. Doleo & angor vehementer ob innumera peccata mea, quibus te benignissimum Redemptorem offendi, diaboli servum me feci, indignationem tuam provocavi.

4. O si nunquam, Amantissime Pater, præcepta tua transgressus essem! ô si nunquam in tantam miseriam, & calamitatem incidissem! ô si nunquam peccassem! ô illos felices, qui innocentiam non perdidit, qui baptismatis gratiam illibatam custodierunt.

5. Statuo, summe Deus, impostero non peccare: firmissimè propono tua sanctissima præcepta non transgredi; verè & ex corde decerno cum adjutorio gratiæ tuæ universam legem implere.

6. Respice in me, Domine, oculis misericordiæ tuæ, dele præterita peccata mea, concede mihi per bonitatem tuam gratiam emendationis.

7. O quanta fuit hætenus ignavia mea! tempus ad poenitentiam concessum perdidit, gratiam & auxilia rejeci, vocibus tuis, quibus me vocabas, absurdus: & nunc, Domine, quid faciam? Poenitet me peccasse, miserere mei.

8. Eheu Domine Deus, quanta sunt vulnera mea, quanta infirmitas, & pravitas mea, pro quibus sanandis crucifixus es & occisus.

9. Deus propitius esto mihi peccatori: Jesu filii Dei vivi miserere mei.

10. Dominator vitæ meæ, ecce vides, quia non est in me bonum, nec sanitas animæ meæ: miser & cæcus sum, nihil possum, nihil sum sine te.

DECAS III.

1. **O** Salvator piissime, tu scis quot mala commisi, quot bona omisi: propitius esto mihi, & salva me.

2. O magna domus Dei, quàm vilis mihi fuisti, & quàm turpiter te pro nihilo contempsi?

3. O quàm justè me in infernum detrudere poteris, justissime judex, & mihi clementer pepercisti.

4. Confiteor, Domine, me omnium quos mundus habet vitiosissimum esse; sed nihilominus in immensâ confido bonitate tuâ. Et si sunt super numerum peccata mea, non est etiam numerus misericordiæ tuæ.

5. Deus tu scis insipientiam meam, & delicta mea à te non sunt abscondita. Delicta juventutis meæ, & ignorantias meas ne memineris.

6. Deus meus, misericordiæ mea, oro te per dilectum filium tuum, da mihi virtutes amplecti, vitia rejicere, terrena calcare, cœlestia fruire.

7. Væ tempori illi, quando te non cognoscebam summum bonum animæ meæ: væ cecitati illi, quando te non videbam.

8. Domine Deus meus, quando plenè mihi moriar, & tibi vivam? quando me ab omnibus rebus terrenis expediam? quando sensus meos & affectus plenè cohibebo, & quidquid est in me vitiosum frænabo?

9. O si jam mundum contemnerem! ô si terrena calcarem! ô si quod amant mundani pro nihilo ducerem!

10. Utinam ab omni vitio purgatus, & ab omni inordinatâ affectione emundatus divino il-lapsu dignus essem, & cœlestium charismatibus gratiarum.

DECAS IV.

1. **M**ortifica, Domine, passiones meas, cohibe illas, & moderare amore & præsentia tuâ, ne me perturbent; sed magis ad id juvent, cujus gratiâ eas dedisti, ad bonas scilicet operationes.

2. Amove à corde meo inanes cogitationes, & verear illud evolere in conclavi animæ meæ, ubi tu habitas, quod, si ad noticiam hominum venturum esset, cogitare erubescerem.

3. Vilescat mihi, Domine, omnis creatura, & nihil mihi placeat, nisi tu.

R 3

4. Dul-

4. Dulcis Jesu, quàm amabilis est gratia tua, quàm suavis amicitia tua? ne quæso abjicias me propter peccata mea.

5. Ne projicias me Deus à facie tuâ, accelera precor, & sensus meos erue citò de luto fœcis.

6. Ablue me, Domine, pretioso sanguine tuo, sana me vulneribus tuis, sanctifica me amarissimâ passione & morte tuâ.

7. Qui plasmâsti me, & per crucem tuam redemisti mundum, adjuva me, & miserere mei.

8. Aperi mihi viscera benignitatis tuæ, clementissime Pater, recipe me in gratiam tuam, & dimitte omnia peccata mea.

9. Da mihi Domine fortis, & patiens tantam contritionem, quantam scis deberi peccatis meis. Peccavi, miserere mei.

10. Hic ure, hic seca, ut in æternum parcas: hic me castiga, & noli in futurum reservare mala mea.

D E C A S V.

1. **P**eccavi super numerum arenæ maris, indignus sum, Domine, miserationibus tuis, sed misericordia tua superat scelera mea.

2. Nonne dixisti, Domine, gaudium esse in cœlo super uno peccatore pœnitentiam agente? exple igitur hoc gaudium in cœlis de me.

3. Tu Domine, qui non vis mortem peccatoris, sed ut convertatur & vivat, largire mihi vitam, quâ destitutor.

4. Venistine Domine, ut justos traheres ad te, an ut peccatores? Si peccatores? ecce me maximum omnium, trahere me ad te.

5. Miserere mei Deus secundum magnam misericordiam tuam: & secundum multitudinem miserationum tuarum dele iniquitatem meam.

6. Asperge me Domine sanguine tuo, & super nivem dealbabor.

7. Cor mundum crea in me Deus, detergis fordibus animæ meæ.

8. Redemptor animæ meæ, quamdiù avertis faciem tuam à me, & non succurris gementi?

9. Ecce me filium prodigum, & prodigo deterior: miserere Pater, & dona me annulo, & veste, & dignum fac amplexu tuo.

10. Non sit frustra pro me fusus sanguis tuus, dulcissime Salvator, sed in salutem, & vitam æternam.

D E C A S VI.

1. **Q**uouque non mederis vulneribus meis medicorum peritissime, & clementissime Jesu Christe? Ecce cœcus sum ad videnda, quæ recta sunt, claudus ad preces, paralyticus ad opera bona: miserere, & sana me.

2. Sanguine tuo medere mihi Domine, & cura vulneribus tuis vulnera mea.

3. Domine ne in furore tuo arguas me, neque in irâ tuâ corripias me.

4. Ecce ego servus tuus sum, & filius ancillæ tuæ, lætifica animam servi tui, quoniam ad te, Domine, animam meam levavi.

5. Non mereor filii nomen, & tamen tu pater es: semper sis, ut semper sim filius.

6. Deus tu scis insipientiam meam, & delicta mea à te non sunt abscondita. Utinam non peream in insipientiâ meâ.

7. Dixi, confitebor adversum me injustitiam meam Domino, & tu remisisti impietatem peccati mei.

8. Non veniat mihi pes superbiæ, & manus peccatoris non moveat me.

9. Delicta quis intelligit? Ab occultis meis munda me Domine, & ab alienis parce servo tuo.

10. Memento quæso quod sicut lutum feceris me, & in pulverem reduces me.

D E C A S VII.

1. **N**on intres in iudicium cum servo tuo Domine, quia non justificabitur in conspectu tuo omnis vivens. Misericordiâ indigeo, pacem quæro, non iudicium.

2. Vide humilitatem meam & laborem meum, & dimitte universa delicta mea.

3. Ostendo tibi Pater immania delicta mea, quæ libentius occultarem, si possem, & obliterarem sanguine cordis mei. Atque utinam aboleantur unâ guttâ sanguinis dilectissimi Filii tui, Redemptoris mei, ne appareat coram te fœditas mea.

4. Heu me, Domine, quia pejor Dæmonibus sum; & in naturâ quidem manifestum est, in moribus etiam fateor, nam video plura in me peccata, quàm in illis.

5. Confiteor tibi, Deus meus, dedecora mea in laude tuâ; recolo coram te scelera mea, non quòd ea amem, sed ut amem te lumen oculorum meorum, & fontem misericordiarum.

6. Purissime & sanctissime Deus, malo milies mori, quam te vel levissime offendere.

7. A nullo hoste magis timeo, quam à meipso. Quis me custodiet à meipso? Non utique ego. Nisi enim tu custodieris me, frustra ego vigo ad mei custodiam.

8. Veni Domine ad me, quia longè recessi à te. Doce me venire ad te, non enim possum, nisi tu, qui es via, doceas me.

9. Detestor peccata mea, Deus meus, corde salvatoris mei: Sicut cor Jesu ea flevit, ita ea ploro & abominor.

10. Quis mihi det, ut sit magna velut mare contritio mea, ex quo lachrymarum flumina exeant, & in illud intrent, ut iterum ac perenniter fluant?

DECAS VIII.

1. **O** Ubi estis lacrymæ, ubi dolores? Deserite omnes, & in me tot scelerum reum agminatim irruite.

2. O quàm bonum erat mihi, si natus non fuisset: neque enim vitam mihi dedisti; ut te offenderem Deus meus.

3. O Sol mundi oculo, qui me toties peccantem aspexisti, urinam me deinceps non nisi dolentem, & lugentem aspicias.

4. Contremiscite omnes artus mei ad horrificum nomen peccati. Et vos omnes creaturæ vindicate in me creatoris offensam.

5. O qualem Deum offendi, quàm amabilem, quàm amantem mei, Deum dilectionis, beneficentiæ, & bonitatis?

6. Quid iniquitatis inveni in te, ò bone Jesu, ut tam crudeliter, tam impiè agerem tecum?

7. O si quod factum est, possem infectum reddere! ò si tempus præteritum revocare! quàm libenter cum perditâ innocentia vitam commutarem!

8. Pœnitent me peccasse Deus meus, semperque pœnitent: & si possem, infinito dolore dolerem, quòd offenderim te.

9. Convertere Domine, & eripe animam meam, salvum me fac propter misericordiam tuam.

10. Vide Domine afflictionem meam amarum nimis, quia non est qui auxilietur mihi, nisi tu Deus meus.

DECAS IX.

1. **S**iccine permittis, Domine, me indignissimam creaturam tuam à terrâ sustentari? ò quanta est bonitas, & misericordia tua!

2. Placare, Domine, & ostende mihi serenum vultum tuum.

3. Ecce Deus tuus, anima mea, ecce qui delet peccata tua: vide quanta pro te pertulit, quanta charitate te diligit: cave nè unquam ab eo discedas.

4. Hoc unum à te peto Domine mi, exaudi me, ut non peccem, ut cognoscam, & faciam voluntatem tuam.

5. Veni Domine in cor meum, fac flagellum de funiculis, & ejice ab eo omnes profanantes domum tuam.

6. Da mihi, Jesu benignissime, unam ex tuis lacrymis, quas pro me uberrimè effudisti, ut eam offeram Patri tuo in satisfactionem pro peccatis meis.

7. Recipe fugitivum tuum, Clementissime Pater, pateat mihi pulsanti janua tua, accipe me fugientem ab inimicis.

8. Mortifica & avelle à me quidquid displicet tibi: vivifica, & auge in me, quod tibi placet, tu qui mortificas, & vivificas.

9. O Pater amantissime, si vis potes me mundare. Sana animam meam, quia fateor me peccasse.

10. O si omni vitio carerem! ò si sensus ab illicitis objectis chiberem! ò si totus compositus intus & foris essem! Quando, quando ab omni labe purus ero? Quando ita expurgatus, & ordinatus, ut nihil appareat in me, quod intuentium oculos possit offendere? Adjuva me Domine Deus meus, & peccatricis animæ meæ ablue sordes.

CAPUT XII.

Pia desideria ad usum Proficientium.

Anima, quæ à Deo aberraverat, postquam rediit in viam bonam, similis est filiis Israël, quos Dominus in manu forti de servitute Ægypticâ liberavit. Sicut enim illi egressi de Ægypto in terram fluentem lac & mel, duce Mose, progressi sunt: ita anima ad ulteriora procedere debet; contemptis hostium tentationibus ad reditum in Ægyptum sollicitantibus, quia Dominus pro nobis pugnat, & adiutor noster est;